

# Obi, Pensa y Faze

## Prende sigi instruson

“Spéra.” “Kumê spageti ku garfu.” “Da bu amigu un vês.”  
Prende abilidadis di sigi instruson ta djuda kriansas  
prende konporta dretu ku otus algen.

### Kel Báziku

Bebês pode ser bon na sigi instrusons sinplis, sima  
“da mamá bóla.” Kriansas pikinóti ta meste dizenvolve  
txeu abilidadi pa es bira bon na sigi instrusons más  
konplikadu. Es ta meste ser kapás di obi. Es ta meste  
ser kapás di intende kuzê ki es sta ta fladu y lenbra  
kada pasu. Y es ta meste ten abilidadis sértu pa es  
konsigi faze kel ki es pididu.

Mésmu ténpu ki kriansas sta ta prende sigi instrusons,  
es sta tanbe ta konstrui ses independénsia. Es sta ta testa  
ses kapasidadi di faze kuzas di ses manera. Purisu, pode  
ser ki es ka kre sênpri sigi bus instruson!

### Atenson

Bu ta atxa kes matirial ki sta sublinhadu na bu kit.

### Kuzas pa Sprimenta ku Idadis entri 2 y 5 anu

#### Roda, badja y konjela

- Bana un lénsu na altura pa riba di bu kabésa. Konvida  
bu fidju pa kopiá-bu. Dipos, bana-l pa baxu pértu  
di dédu di pê. Dexa-l kopiá-bu otu bês. Faze un  
muviméntu di kada bês. Tenta bate palma, salta ô  
roda. Dipos dexa bu fidju ser líder.
- Faze dos muviméntu mésmu ténpu pa bu fidju kôpia.  
Bana lénsu na altura pa riba di bu kabésa y salta. Ô  
bana-l enkuantu bu ta roda. Faze kes muviméntu la  
rápidamenti ô divagar. Poi múzika y insentiva bu fidju  
pa sigi bus pasu. Kada óra un di nhos pode ser líder!
- Faze un jogu di “badja, konjela”. Splika instruson.  
Óra ki múzika kumesa, tudu algen ta badja. Óra ki  
múzika pára, tudu algen ta konjela y ta fika más  
paradu pusível.

### Kumesa

É más fásil sigi instruson óra ki  
instruson é klaru. Uza palavras ki bu  
fidju ta intende. “Poi bus blóku na  
pratilera.” Dexa bu fidju tirmina un  
taréfa antis di bu da-l instruson pa  
otu taréfa. Prende sigi instruson ta  
iziji prátika y txeu pasénsia!



Más! →

## Kuzas pa Sprimenta ku Idadis entri 2 y 5 anu

### Pista di obstákulu

- Poi trêsh trabiseru ô otus objétu masiu nun fila na txon pa faze un dizafiu fíziku sinplis pa bu fidju. “Gatinha di priméru trabiseru pa segundu trabiseru. Dipos di segundu trabiseru pa terseru trabsieru.” Tenta “anda sima un gatu” ô “salta sima un kuedju” ô “disliza sima un kóbra.”
- Djunta alguns dizafiu pa faze un pista di obstákulu. Uza un kuza pa salta pa riba d’el, sima trabiseru. Poi un kuza pa gatinha baxu d’el, sima un kadera ô méza. Poi un kuza pa anda a vólta d’el, sima bonékus di pelúsia. Da instruson klaru. Dipos... “Priparadu, pruntu, já!” Muda órdi di dizafius y torna faze.
- Sai na rua! Dizenha un pista di obstákulu ku jis prusesadu. Faze linha pa anda riba d’el, sírkulu pa salta riba d’el, spiral pa roda riba d’el, y mutu más. Sprimenta kel pista di obstákulu enkuantu bu ta anda, kóre ô salta. Da instruson klaru kada bês.



## Interasons di Dia-Dia

Nhos faze kumida djuntu. Lê kada instruson di riseita ku vós altu. Pidi bu fidju pa djudá-bu diskubri kuzê ki signífika. Dipos, nhos faze-l djuntu.

Kriansas gusta di ser útil. Da-l un trabadju di ajudanti ku instruson spisífiku. “Poi garfu na méza pa djanta, pur favor.”

## Dimonstra, Rapara, Pratika

**“Bu kre pa N alinha kes blóku li sima kaminhu di féru pa konboiu? Bon ideia! N ta faze kel-la.”**

Dimonstra módi ki ta sigidu instruson - mésmu alguns instruson ki bu fidju dá-bu.

**“N gusta di manera ki bu skova denti. Bu poi pasta na skova priméru.”**

Rapara óra ki bu fidju sta ta sigi instruson. Fla kuzê ki el faze dretu.

**“Pur favor, poi bus blóku na sestu.” ... “Opa! Bu poi bus blóku na txon. Torna tenta.”**

Prende sigi instruson ta iziji prátika. Tenta ka xátia. As vês bu fidju sta faze midjor ki el sabe!